

四庫全書

集部

欽定四庫全書

集部

宋詩紀事卷五十三

詳校官監察御史臣李陽樞

侍讀臣孫球覆勘

總校官進士臣繆琪

校對官中書臣牛稔文

謄錄監生臣齊兆求

欽定四庫全書

宋詩紀事卷五十三

錢塘厲鶚撰

陳 謹

謹字仲甫莆田人隆興元年進士累官兵部侍郎乞補外以集英殿修撰知寧國府再乞致仕封清源郡侯

過溪南韓氏宅

曾覽溪南勝重來四十年樹如人老矣山共水依然香玉

紛堆案晴虹對跨川吾廬今咫尺乘興且盤旋

蒲陽文獻

句

竹密不知雲欲雨山高盡見水朝宗

四朝聞見錄蒲陽陳諫文人也刻金字于靈壁石以壽韓侂胄至稱曰我王韓敗遂為言者所彈陳留題吳山三茅觀梅亭句云云繼是猶未

有和者

方有開

有開字躬明淳安人隆興元年進士嘗官淮西

運判有溪堂集

方仙翁祠

真仙祠觀鎖晴嵐下瞰平疇十里寬
譜牒尚遺唐篆額風儀仍是漢衣冠
紫芝白兔靈如昨石碣丹湖事不刊
千載仍孫牛馬走敬瞻遺像仰高寒

青溪詩集

張良臣

良臣字武子汴人避寇來鄆因家焉隆興元年
進士官止監左藏庫有雪窗小集

樓大防書集後云武子閉門讀書室無一物性
嗜詩不輕作或終歲無一語故所作必絕人

春詞

後主寧香復倚春潘
嬌梳洗最輕盈
南朝破後無詞客
燕子桃花古石城

曉行

千山萬山星斗落
一聲兩聲鐘磬清
路入小橋和夢過
豆花深處草蟲鳴

賦

柳暗旗亭不忍看
臨江愁殺晉衣冠
傷心明月揚州路

十里珠簾蕙草寒

示長蘆仁禪師

叢叢竹雀鬧人家農事春來漸有涯
品字柴頭煨正煖不知風雪到梅花

梅市道中

連雨疎篷不耐關脩眉如失更晴慳
越王故國無人問艇子穿花自往還

西湖晚歸

帖帖平湖印晚天
踏歌遊女臂相牽
鳳城半掩人爭路
猶有胡琴落後船

留題吳興投老庵

白鷺悠悠去不還
渚雲汀草一生閑
暮年不入西州路
空倚梅花說住山

九日書呂季慈室

上池入寺見承平
影落南州迹易陳
手把黃花看新雁
風烟愁殺舊京人

感舊

三十六陂春水綠
四十九年人事非
揚子江頭永嘉後
吳儂蕩槳北人稀

過西溪

罨畫層波蕙草荒
冷雲客雁兩回皇
梅花到得吹成雪
盡是清愁不是香

遣家書

家住鄱陽小洞天
經年烹鯉尚茫然
幾回鵲喜無消息

吹殺燈花獨自眠

小破

小破燕支鈿早梅雪雲平淡越江遲青山歲晚行人少
鴨鴨羣飛淺草時

以上雪窗小集

上雪竇山奉慈院

迢迢嶺外雪雲明猶憶塵中見偉人沙上豈無新到雁

附來莫厭尺書頻

延祐四明志

長松丹井

九轉丹砂煉得成飄飄仙袂入青冥一泓寒水留真汞

千歲長松產茯苓

雲門志畧

句

客向愁中都老盡祇留平楚伴銷凝

樓攻媿集跋

張縯

縯字季長蜀之唐安人隆興元年進士官大理

少卿

奉陪安撫大卿登八陣臺覽觀忠武侯諸葛公遺

像偶成長句

白帝城西魚復浦十月江平見津滸當年累石紛成行

此地卧龍經講武轅門外建巖中權

自注陣有壁壘一門東出

列陣

相承存後伍

自注八陣相承又列數陣于後

何人蛇勢識常山未數魚

麗矜鄭拒懸知精神貫金石尚想號令嚴鉦鼓老兵料

敵應疑生川后澄波其敢侮向令赤伏有餘符下睨皇

州真指取云何遺跡司神明獨靳豐功被寰宇高城置

酒共臨眺往事興懷增歎撫巍然王佐三代前信矣名

言照千古

全蜀藝文志

題沔州諸葛武侯廟

赤伏終休運前營落大星皇王空禮樂江漢闕英靈斷

龍牛羊入空山草木青經時須此牧清淚灑泉扃

陝西

通志

黃度

度字文叔新昌人隆興元年進士寧宗朝累官

禮部尚書以煥章閣學士知隆興府

青溪閣

江家舊宅枕溪頭
誰向溪灣著小樓
無柰當年亡國恨
潮生潮落幾時休

景定建康志

楊方

方字子直長汀人自號淡軒老叟隆興元年進士嘗受學于朱子之門仕至直寶謨閣廣西提刑

趙南塘跋云公暮年詩精清簡遠與俗異畛

淳熙辛丑自武寧丞攝靖安作

毛竹山頭雲雨昏
靖安橋下小谿渾
高陂約水歸田急
不管湍聲入縣門

堂上官人似野人
村畝相見可相親
開門坐對臨溪樹
故是水邊林下身

對縣誰家數畝園
竹亭茅宇雜花繁
同官不可無蕪局
通管溪南水竹村

題武寧丞廳

暮年叢薄寄鷓鴣搔首巡簷歲月銷留與後人還要否
一軒松竹冷蕭蕭

館中簡張約齋

書生賦分合窮愁官與休辰不冝休清曉犯寒開省戶
誰家見雪似瀛洲

爛銀官闕雲中見素奈園林月下遊說與南湖張祕閣
速來同直道山頭

以上後村詩話

傅伯壽

伯壽字景仁晉江人隆興元年進士紹熙中官

浙西提刑

一段奇軒

在西湖淨相院

門外紅塵走利名
庵中白髮任浮生
羨師法窟能深入
厭我詩壇已屢盟
渺渺水光簾萬疊
離離梅影雪三更
何人薦取真消息
試鼓瑤琴一再行

咸淳臨安志

一眺石

一眺人間萬事非
海鷗山鳥便忘機
林端髣髴見帆影

知有扁舟天際歸

南安縣志

張抑

一段奇軒

雲山爛漫本難名收拾閑情付此生
出處自知無上策往來聊欲試同盟
門多賢轍人便靜琴鎖師堂歲幾更
六月岸中來借榻頻頻遊應不禁船行

咸淳臨安志

傅伯成

伯成字景初其先濟原人祖忠肅公察父自得

避地居泉州為晉江人隆興元年與兄伯壽同
舉進士理宗朝官至寶文閣學士提舉佑神觀
卒贈開府儀同三司諡忠簡有竹隱集

素馨花

自注素馨南漢宮女名

昔日雲鬟鎖翠屏
祇今烟冢伴荒城
香魂斷絕無人問
空有幽花獨擅名

全芳備祖

許及之

及之字深甫温州永嘉人隆興元年進士寧宗

朝歷官參知政事知樞密院事有北征紀行詩集

廢冢

石人猶自立蒿萊拂讀殘碑字字哀鄰冢已澆寒食酒
野風分送紙錢來

東甌詩集

孫逢吉

逢吉字從之龍泉人隆興元年進士寧宗朝歷
祕書監兼吏部侍郎出知太平州馬祠卒謚獻

簡

茅亭

在泉州陳洪進宴游之地今廢

陳氏當年為勝概
吾徒今日作良游
時遷代謝皆如此
細雨燈花莫浪愁

方輿勝覽

程迥

迥字可久寧陵人家于沙隨隆興元年進士仕
為德興丞調上饒令迥深于經學學者稱沙隨
先生有南齋小集

題玉真書院

在德興縣玉真山麓邑人吳紹古建陸九淵有經德堂扁

吳侯所築居密近玉真麓翳歲祕幽竒千載空喬木一
朝敞虛境劃見神仙躅挂杖步危磴遠寄千里目鶴憑
子晉笙鳬舉王喬足信是隱君子名入丹青錄冥搜得
佳句隱然可騷僕早聞雲錦溪鳴榔到巖谷寄我輞川
圖居然媚幽獨何當擢輕舸飛鳥送遐矚

饒州府志

自題所怡齋

乞得膠膠擾擾身霜筠露菊便相親勸君莫厭藁藜藿

違已由來更病人

六月松風萬籟寒
笙竽頻到枕屏間
夜深夢繞匡廬早
瀑布濺珠過藥闌

葵花已過菊花開
萬里西風拂面來
問字今朝幾人至
細看屐齒破蒼苔

困學紀聞

吳 鎰

鎰字仲權崇仁人
曾弟登隆興元年乙科累官
司封郎中極言罷歸有雲巖集

崇仙觀二首

浮丘仙袂風中挹子晉吹笙月下聞翠蓋霓裳君過我
旃輿神馬我從君

人生塵土不可耐天上高寒定自嘉但約麻姑擘麟脯
莫尋句漏問丹砂

撫州府志

送客香山寺

十里香山寺三年到幾回不嫌送客遠端是愛山來老
木依山住開雲為我開歸鞍意未足城鼓莫相催

郴州文志

陸游

游字務觀越州山陰人佃之孫宰之子以蔭補
登仕郎隆興初賜進士出身范成大帥蜀為參
議官人譏其頽放因自號放翁累知嚴州嘉泰
初詔同修國史兼祕書監升寶章閣待制致仕
卒有渭南集劔南集

直齋陳氏云游幼為曾吉父所賞識詩為中興
之冠他文亦佳而詩最富至萬餘篇古今未有
四朝聞見錄陸公早退居往來雲門若耶韓侂
胄固欲其出落致仕除次對公勉為之出韓喜

附已至出所愛四夫人擘阮琴起舞索公為詞
有飛上錦裯紅皺之語公臨終以詩示其家云
王師克復中原日家祭毋忘告乃翁公之心方
暴白于易簣之時矣

臨安春雨初霽

世味年來薄似紗誰令騎馬客京華小樓一夜聽春雨
深巷明朝賣杏花矮紙斜行閒作草晴窗細乳戲分茶
素衣莫起風塵歎猶及清明可到家

後村詩話放翁少時調官臨安得句云小樓一
夜聽春雨深巷明朝賣杏花傳入禁中思陵稱
賞由是知名

陳阜卿先生為兩浙轉運司考試官時秦丞相孫
以右文殿修撰來就試直欲首送阜卿得予文卷
擢置第一秦氏大怒予明年既顯黜先生亦幾陷
危機偶秦公薨遂已予晚歲料理故篋得先生手
帖追感平昔作長句以識其事不知衰涕之集也
冀北當年浩莫分斯人一顧每空羣國家科第與風漢
天下英雄惟使君後進何人知大老橫流無地寄斯文
自憐衰鈍辜真賞猶竊虛名海內聞

恩封渭南伯唐詩人趙嘏為渭南尉當時謂之趙渭南後來將以予為陸渭南乎戲作長句

老向人間久倦遊君恩乞與渭川秋虛名定作陳驚坐
好句真慙趙倚樓棧豆十年霑病馬烟波萬里著浮鷗
就封他日輕裘去應過三峯處處留

示兒

死去元知萬事空但悲不見九州同王師北定中原日

家祭無忘告乃翁

以上劔南集

絕句

碧玉當年未破瓜
學成歌舞入侯家
如今顚顚篷窗底
飛上青天妒落花

懷成都舊游二首

金鞭朱彈憶春游
萬里橋邊罨畫樓
夢倩曉風吹不斷
書憑春雁寄無由
鏡中顏鬢今如此
席上賓朋好在否
篋有吳牋三百箇
擬將細字寫春愁

裘馬清狂錦水濱
是繁華地作閒人
金壺投箭消長日

紅袖傳杯領好春
幽鳥語隨歌處拍
落花鋪作舞時茵
悠然自適君知否
身與浮名孰重輕

齊東野語陸放翁在蜀日有所盼嘗賦詩云云
出蜀後每懷舊遊多見之賦詠云云

沈園二絕 慶元己未作

夢斷香銷四十年
沈園柳老不飛綿
此身行作稽山土
猶弔遺蹤一悵然

城上斜陽畫角哀
沈園無復舊池臺
傷心橋下春波綠
曾是驚鴻照影來

禹蹟寺南有沈氏小園四十年前嘗題小詞一闋

壁間偶復一到而園已三易主讀之悵然

紹熙壬子作

楓葉初丹槲葉黃
河陽愁鬢怯新霜
林亭感舊空回首
泉路憑誰說斷腸
壞壁醉題塵漠漠
斷雲幽夢事茫茫
年來妄念消除盡
回向蒲龕一炷香

歲暮夜夢遊沈氏園兩絕

開禧乙丑作

路近城南已怕行
沈家園裏更傷情
香穿客袖梅花在
綠蘸寺橋春水生

城南小陌又逢春只見梅花不見人
玉骨久成泉下土
墨痕猶鎖壁間塵

齊東野語陸務觀初娶唐氏于其母夫人為姑
姪伉儷相得而弗獲于其姑既出而未忍絕之
則為別館時時往焉姑知而掩之雖先知挈去
然事不得隱竟絕之唐後改適同郡宗子士程
嘗以春日出游相遇于禹蹟寺南之沈氏園唐
以語趙遣致酒餽翁悵然久之為賦釵頭鳳一
詞題園壁間實紹興乙亥歲也翁居鑑湖之三
山晚歲每入城必登寺眺望不能勝情未久唐
氏死嘗作詩共五首云

紀夢

白首歸修汗簡書每因囊粟歎侏儒不知月給千壺酒
得似蓮花博士無

趙章泉梅課云嘉泰壬戌九月陸放翁夢一故人相語曰我為蓮花博士鏡湖新置官也我去矣君能暫為之乎月得酒千壺亦不惡也遂以詩紀之云云

致爽軒

在永康軍

黃塵赤日汗霑裾竹裏煎茶喜有餘堪笑放翁窮意巧

就居池館讀君書

方輿勝覽

感姚將軍事題青城山上清宮壁

造物因豪傑意將使有為功名未足言或作出世資姚
公勇冠軍百戰起西陲天方覆中原殆非一木支脫身
五十年世人識公誰但驚山澤間有此熊豹姿我亦志
方外白頭未逢師年來幸廢放儻遂與世辭從公遊五
岳稽首餐靈芝金骨換綠髓欽然雲外飛

庶齋老學叢談姚將軍靖康初以戰敗亡命建
炎中下詔求之不可得後五十年乃從呂洞賓
劉高尚往來名山有見之者放翁感其事作詩

感趙宗印事

我夢游太華雲開千仞青擎山瀉黃河萬古仰巨靈往
者禍亂初氛侵干太寧豈無卧雲龍一起奔風霆時事
方錯繆三秦盡羶腥山河消王氣原野失天刑將軍散
髮去短劍斲茯苓定知三峯上爛醉今未醒

庶齋老學叢談靖康建炎間關中奇士趙宗印
提義兵出戰有衆數千所向輒下敵不敢當會
王師敗于富平宗印知事不濟大慟于王景畧
廟盡以金帛散其下披髮入華山不知所終放
翁感其事作詩云云

韓幹馬

唐人畫馬如相馬口口不在驪與黃天機入神即揮灑
氣脫毫素先騰驤昔年曾畫穆王游八極八龍之駿雲
五色後來又寫越影超光脫丹碧後來又寫漢武窮渥
洼復見神駒來漢家勢走滅沒開風沙壯哉此馬健且
雄玉花徧身雲滿髮首如渴烏眼如電皎如疋練橫睛
空使之陷陣當破敵萬馬不敢先秋風如何解鞍脫其
韁縱爾倣儻如游龍君不見四海罷征戰九夷盡梯航
方將卻爾宛水之西歸爾華山之陽幸逢韓供奉寫爾

神杜拾遺歌爾良贈爾支道林愛爾神駿懸高堂

網
瑚珊

句

積憤有時歌易水孤忠無路哭昭陵

娛書堂詩話唐制有冤者哭昭陵下李洞策夜
獻簾詩云公道此時如不得昭陵痛哭一生休
陸務觀亦有句云云

虞 儔

儔字壽老寧國人隆興初入太學舉進士以太

常少卿使金累官兵部侍郎奉祠卒有尊白堂集

過千秋嶺

輕陰漠漠雨斑斑
嶺上風來一解顏
已是去天纔尺五
卻令緩步有躋攀
飛泉百道縈羅帶
列岫千峯擁翠鬟
應是北堂春正滿
幾迴回首望家山

寧國府志

馬之純

之純字師文金華人隆興進士慶元間主管江

東轉運司文字著金陵百詠世號野亭先生孫
光祖有名

元武湖

萬頃冥茫水拍隄當時于此習舟師
長江天險雖堪恃
鬪艦人謀可勿施
莫使黑龍離舊窟
且教元武入新詞
如何又作蓬瀛景
時節來遊看水嬉

東冶亭

舊時祇說東西冶
今日轉為長短亭
無奈梅花臨水白

可堪柳色向人青十分潏潏苦難把三疊淒涼誰忍聽
不道離愁堆滿屋往來車馬放教停

以上景定建康志

郭明復

明復成都人印子隆興癸未登科仕為宗丞

題琵琶亭

并序

白樂天流落湓浦作琵琶行其放懷適意視憂患死
生禍福得喪為何物非深于道者能之乎賈傅謫長
沙抑鬱致死陸相竄南賓屏絕人事至從狗竇中度食

飲兩公猶有累乎世未能如樂天逍遙自得也予過
九江維舟琵琶亭下為賦此章時淳熙己亥中元日
香山居士頭欲白秋風吹作湓城客眼看世事等虛空
雲夢胸中無一物舉觴獨醉天為家詩成萬象遭梳爬
不管時人皆欲殺夜深江上聽琵琶賈胡老婦兒女語
淚溼青衫如著雨此公豈作少狂夢與世浮沈聊爾汝
我來後公三百年潯陽至今無管弦
自注公詩有潯陽小處無音樂之句
長安不見遺音寂依舊康廬翠埽天

客齋三筆賈誼自長沙召還後為梁王傳乃卒
前所云少誤矣

題三峽堂

三峽堂前五月風吳檣蜀柁古來通山如肺附重相掩
水似環連去不窮躍馬孤城憐倔強卧龍八陣想英雄
憑闌千載興亡事何異邯鄲一枕中

大人按部過雲安下巖留題命同賦

道人昔日來開山山鬼悔泣門不關一時梵宇借嵩麓
千載絕景歸人間松蘿鬱勃樹旌纛水泉丁東鳴佩環

兩蘇寂寞涪翁死杖屨誰與同躋攀

以上全蜀藝文志

陳翊

翊字君正

甲申仲冬侍親由行在所還毘陵舟泊村渚

日暮成孤泊棲遲得小安雪融沙觜露雲拂雁翎寒過

櫓冰痕轉通村水汊寬詩情如廢井賸覺起波瀾

前賢小集

拾遺

黃然

然豫章人隆興中官右朝請郎知台州

涪翁亭

在蜀嘉陵

清音妙絕東坡老方響名高太史公水遠鳥飛談笑外

江連洪雅畫圖中

方輿勝覽

張維

維字仲欽延平人隆興中通判建康府事乾道

中廣西經畧安撫使

留守舍人張公安國聞維築亭為題其榜曰朝陽

既去而亭成復為賦詩次韻

日邊清切以文鳴立對朝陽欲問程
筆落春生變寒谷
詩來將喜破愁城
簷前水到乘槎便
天際山橫與檻平
準擬公歸道過此小留觴
詠集簪纓

景定建康志

題張公洞

年來行樂與民同探穴追蹤太史公
幽洞初開名易著
蒼崖新刻句難工
風驅俗駕松扉外
雲鎖仙丹石室中
付與山僧司管鑰
勿教勝地草蒙茏

桂勝

蔡勘

勘字定夫莆田人襄之後乾道二年進士除祕書省正字知江陰軍

題盱眙

自古東南第一山于今無異玉門關亂雲衰草蒼茫外
赤縣神州指顧間擊楫何人酬壯志凭闌終日慘愁顏
中原父老應遺恨祇見檀車歲往還

錦繡萬花谷

徐似道

似道字淵子號竹隱黃巖人乾道二年進士歷
官權直學士院遷祕書少監終提點江西刑獄

有竹隱集

貴耳集淵子嘗為少蓬朝聞彈疏坐以小舟載
菖蒲數盆翩然而去道間爭望若神仙

九日

衰容不似秋容好坐上誰憐老孟嘉牢裏烏紗莫吹卻
免教白髮見黃花 鶴林玉露

偶題

老去功名不挂懷高眠之外祇清齋偶因種竹便多事

風葉掃餘還滿階

詩家鼎鑪

買硯

俸餘擬辦買山錢卻買端州古硯
硯依舊被渠驅使在
買山之事定何年

鶴林玉露劉改之賀徐直院啟云以載鶴之船載書入覲之清標如此移買山之錢買硯平生之雅好可知用其詩語也

廬山得蟹

不到廬山辜負目不食螃蟹辜負腹亦知二者古難并
到得九江吾事足廬山偃蹇坐吾前螃蟹郭索來酒邊
持螯把酒與山對世無此樂三百年時人愛畫陶靖節
菊籬東遠手親折何如更畫我持螯共對廬山作三絕
貴耳集

蓴羹

千里蓴絲未下鹽北遊誰復話江南可憐一筋秋風味
錯被旁人舌本參

送春

圓蒲相將結僧夏荷葉蒲茸綠相亞浮花浪葉自飄零
小院迴廊正瀟灑葉如青幄花成茵細腰起舞來送春
紙光如銀墨如漆落筆四座驚有神輕衫短帽付餘子
花前醉倒輸閑人

以上全芳備祖

舟行

大官連檣十萬艘小官僅得一葉如漁舸其中何所有
白髮翁媪并兒曹赤腳婢三後執爨蒼頭奴子前操篙

元真筆牀間茶竈吏部酒杯兼蟹螯書緘一箱半魚蠹
詩束百軸成牛腰平鋪橐結薦貓犬賸買棗栗供猿獐
新花鬱屈作萎木清酒搖蕩成濁醪篷低日覺巾角折
竈近時聞羹釜轅高驤正難望鷓首緩進豈敢爭龍標
全家窟拘歎蹉跎長物屏當隨週遭桑樞駟馬各是累
人肝薇蕨俱成饗不須彼此更相笑未必鬱林之石賢
胡椒

後村詩話

虞仲房司馬遊園約予不赴因次其韻

祕書行處有歌鐘
身在名園錦繡叢
試問高吟梁苑雪
何如共快楚臺風
人鷗不去機方息
魚我相忘樂未窮
待得芙蓉濯雲錦
弄花翻水與君同

赤城詩集

自笑

黃昏茅店帶星入
清曉竹輿蒙露行
客路三千年五十

對人猶是說歸耕

東甌詩集

句

胸中着雲夢皮裏有陽秋
自作先生傳誰為故吏碑

挽錢觀
鬲上村坊酒眉尖野店茶
天寒不知翠袖薄

日煖但覺玉烟生

水仙花

索醉寧傾問字酒忍飢不取

作碑錢

駒入隙來元不礙蠅穿紙出定何妨

紙閣

北風

萬籟自宮徵寒日一軒真袴襦

以上後村詩話

婁機

機字彥發嘉興人乾道二年進士寧宗朝累官
禮部尚書兼給事中權同知樞密院事兼太子
賓客進參知政事提舉洞霄宮

日哦軒

高軒多暇日
宴寢獨怡神
風俗無今古
雲山自主賓
灘平分燕尾
松老半龍鱗
徙倚清陰下
吟懷媿昔人

杭州府志

羅願

願字端良
號存齋
汝楫子
以蔭補承務郎
中乾道二年進士
守鄂州有小集

題興善寺碧玉軒水犀

在新城縣

老照軒前翠已空
忽驚嘉樹碧玲瓏
幽芳自出禪枝外

圓相長標法窟中過客莫辭三宿戀道人已費十年功
要須共結團團坐賞盡清秋面面風

送邕州吳使君

題輿纔赴日邊程便擁油幢鎮列城地望素高唐五管
人才今似漢三明時清市駿非無意歲晏逢花好寄聲
太學英名湖海氣此行持論要平平

以上鄂州小集

黃希

希字夢得宜黃人乾道二年進士終永新令有

補注杜詩未竣而卒子鶴續成之

題石砬

注見鄒極詩

誰賦阿房未霽虹祇誇複道峭凌空那知海石驅來處
都在巖花晏坐中鯨背遠衝千嶂雨鼇頭高占一天風
漫郎更有中興頌倩把蒼崖仔細鑿

撫州府志

周孚

孚字信道濟南人寓家京口乾道二年進士終
真州教官辛稼軒刊其集曰蠹齋鉛刀編

贈蕭光祖

之子固絕俗少年甘寂寥
田園一蠶睫書卷百牛腰
雪徑晴猶凍烟江晚不潮
箇中勤著語老耳待聞韶

宋公佐席上分韻得樓字

誰謂子青眼不嫌予白頭
共穿康樂屐來醉仲宣樓
風定江猶怒雲高雨欲休
西山多爽氣吾忍賦悲秋

寄辛幼安

我屋與君室濟河南北州
相逢楚天晚卻看蜀江流
老

境渾能迴妖氛竟未收何時一塵地歸種故園秋

次韻朱得裕見贈予病初起

蓋世功名黍一炊驚心歲月轂雙馳五漿先饋那須爾
二豎相陵少避之種種鬚毛吾欲老翩翩書札子能奇
黃花無語秋將暮莫惜元談與解頤

以上蠹齋鉛刀編

薛澄

澄鄞人乾道二年進士

效朱公叔絕交詩

東山有梟不祥其名惡木是息惡聲是鳴食不棄腐飲
不擇精宜飛求伏以晦為明凶殘滿志嗜欲惟撓伸頸
招鳳使鳳自驚豈有鳳口而和梟聲奈何伊人弗審物
情請從此別各自謀生

甬上耆舊集

許開

開字仲啟丹徒人乾道二年進士官中奉大夫
提舉武夷沖祐觀有志隱類橐

水仙花

定州紅花瓷塊石藝靈苗芳苞茁水仙厥名為玉霄適
從閩越來綠綬擁翠條十花冒其顛一一振鷺翹粉蕤
間黃白清香從風飄回首天台山更識膽瓶蕉

全芳備祖

洞霄宮

珠宮梁柱太平年福地從知接洞天曲檻一峯飛怪石
幽亭三峽迸流泉驪龍睡重時方早白鶴歸來客欲仙
殿上紅雲西日映此身如在玉皇前

洞霄詩集

謝深甫

深甫字子肅臨海人乾道二年進士累官知樞
密院兼參知政事拜右丞相以少傳致仕理宗
朝以孫女為皇后追封魯王謚惠正有東江集

天台道中

溪繞青山路繞溪山長溪曲路高低晴灘淺澀舟如盪
危磴棱層石作梯晚照荒村飛鳥入秋風落葉敗蟬嘶
碧雲四合長天暮轉使鄉關望眼迷

台州府志

王 枏

相字木叔永嘉人乾道二年進士累官監進奏
院坐僞學罷知江陰軍遷大理丞歷吏部郎中
祕書少監知贛州有合齋集

南康泊舟欲遊廬山值雪

春風浩蕩江湖客咫尺廬山風雨急門前老樹最關情

一夜相思頭盡白

東甌詩集

倪思

思字正甫歸安人乾道二年進士寧宗朝累官

禮部尚書以寶謨閣直學士知福州卒謚文節
有齊齋甲乙橐翰林前後橐

延平港灘

長幾巖石三百里險過瞿唐十八灘幸有溪旁平穩路

何須欲速冒驚湍

方輿勝覽

慈感寺東軒

水花風葉暮蕭然靄靄雲山帶暝烟竚立東軒未能去

更看明月湧晴天

湖州府志

周洎

洎字子及天台人乾道二年進士國子監主簿

拜卞忠貞墓

在金陵冶城

晉鼎艱殆姦人窺孰謀國者如兒嬉陷甯弗設延虎貔
虓鬪搏噬嬰者摧羣公奔潰不敢誰卞公力疾起督師
謂事迫矣奚生為以肉餒虎吁可悲公則死矣二子隨
偉哉忠孝萃一時維公忠義天所資向來謀國如蒼龜
不用吾言至于斯為社稷死則死之冶城之麓江之涓

荒冢突兀餘豐碑半生讀史長歔歔拜公之墳涕霑頤
死者可作吾誰歸嗟哉江左固多士往往所欠惟一死
元規兒輩何足罪王公偏仄石頭裏氣息奄奄有如泉
下鬼蘇武之節不如是視公胡不願有泚男子之死一
言耳死而不亡公父子

景定建康志

楊甲

甲字鼎卿乾道二年進士仕不顯

遊長松寺宿石門僧舍以石門霜露白為韻得露

字

疾風吹輕衣駕我雲脊路人間一回首驚絕不敢顧鳥
投虛無底渺渺不知處蜂窠蟻丘垤與世同所驚試看
一蒼莽誰有不平慮尚憐野僧屋佛面荒苔蠹斷崖劃
呀吻沟沟崩石怒我來得奇觀拄杖叩巖樹青山有驕
色斯客不能句平生二三子慰我一相遇娟娟松間月
幽夕亦可度夜闌更小語風逼遺響去酌君無多酒繼
以木蘭露

登安福浮圖以高標跨蒼穹為韻得跨字

誰能於虛空千仞擢修架層梯高寥寥可歷不可跨疑
從地上涌幻手聊一化飛龍送千柱雷雨天一借巍巍
大勝妙突兀此其亞道人豈澄觀佛事了閑暇指揮三
百尺斤斧隨叱咤當時奮赤手意濶已遭罵後來見奇
特世眼一驚詫塹山作平地海濶梁可駕哀哉耳目陋
未信猶疑嚇凌高更回首落日在雲罇蒼蒼野浮樹漠
漠水分汊悲涼豪傑窟野冢埋王伯百年眼前是俛仰

閱榮謝惟當快飲酒醉聽風鈴夜

朱真人祠

一濯巖下溪再拜巖中庭清風蕭然來吹我衣上腥仙人芙蓉冠乘月下雲輶山空雜佩響夜靜朝百靈似聞客欲去小語猶丁寧肅肅上松栢急以兩耳聽寂寥古壇外但挂斗與星天明恐是夢恍惚遺心形去飲石上水再讀幽人銘青山無行迹霧雨松冥冥

寒食游學射山

疾風吹沙天茫茫日落未落原野黃山空無人石碌碌
路長馬飢石齧足荒苔古林翳雲族何人剗崑縛層屋
當時萬騎填山谷至今拾寶多遺鏹故國山川愁遠目
人世悲歡風雨速淩高舉手天為感手攀崑樹叩雲木
何人唱我淒涼曲興亡一眼冥冥綠野水平蕪飛雁驚

靈泉山中

野色山圍盡風烟更可憐客情牛鐸外農事藕花前聚
汲松根井寬愁石底泉雲安須斗水詩興亦超然

勝地仙靈宅微官也謫居焚香他日夢隱几向來書小
睡便山雨長齋稱野蔬逢人問無恙滿意說樵漁

以上成都

文類

曾懷

懷字欽道晉江人孝寬曾孫建炎初為金壇簿
知真州乾道初賜同進士出身參知政事拜右
丞相封魯國公奉祠卒

恭和御製玉津園宴射

名園佳氣靄非烟冠佩朝宗似百川五品並令陪宴射
四鑊端欲序賓賢恩涵春意魚翻藻威入秋聲雁落弦
竣事更容窺典雅宸章應陋柏梁篇

夢梁錄城南玉津園在嘉會門外四里紹興四年北使來賀天申節遂宴射其中孝廟常臨幸命皇太子宰執親王侍從五品以上官及管軍官講宴射禮孝廟御製詩宰臣曾懷恭和云云

鄭僑

僑字惠叔興化人乾道五年進士第一簽書鎮
南軍節度判官光宗朝權吏部尚書寧宗朝拜

參知政事以觀文殿學士致仕

題夾漈草堂

杪秋尋遠山幽懷鬱沖沖草堂跨層崖夕陽山影空
高人辭天祿結交杖藜翁游氛暗九土歲晚余曷從
泠泠夾漈水謾謾長松風思之不可見淚落秋雲中

莆陽文獻

王希呂

希呂字仲行宿州人渡江居嘉興乾道五年登
進士累除中書舍人給事中轉吏部尚書以端

明殿學士知紹興府

入直學士院作

玉堂晝永暑風微
簌簌飛花落小池
徙倚幽欄憑問訊
夏鶯飛出萬年枝

玉堂雜紀學士院東閣窗下甃小池久無雨則涸傍植金沙月桂之屬又有海棠郁李玉繡毬各一株西偏植金橘逼城根枝不能大花開時滿院結實雖小而甘浙中未易得也王仲行詩云云

湖山十詠 存四首

瑟瑟輕冰折御溝
溝邊柳色弄春柔
數聲啼鳥破幽夢
斷送西湖尋舊游

石罅微泉咽淺沙
沙頭細草換年華
疎籬酒旆常春事
倚馬短檐梅著花

雨挾東風作嫩寒
短牆圍水柳藏烟
游人不入西湖靜
白鷺飛來在畫船

露葵抱藥未全開
翠竹陰涼蔽綠苔
貪看青林飛白鳥

丁丁啄木又驚回

咸淳臨安志

本覺寺三過堂

門外驚風吹細沙入門水氣湛清華
呼童試向林間看
巖桂應開第二花

嘉興府志熙寧間有文長老住寺中東坡三過之故名王希呂有詩

陸 垞

垞字子高本高郵人建炎初徙海鹽乾道五年進士知和州官至尚書有益齋集

醜梨

醜梨出崇德之東貌雖惡而味絕勝聞嘗進御因賦

灰貌疑清古霜津溢脆甜面嫌湯後白心慰邑中黔美
實鍾寒谷珍嘗近御匳彼姝徒冠玉爭得似無鹽

至元
嘉禾

志

曾 丰

丰字幼度撫州樂安人乾道五年進士官德慶
太守恬于仕進築室曰搏齋有緣督集

賀皇太子生日

運轉黃河舊波澄少海清菊籬浮喜色蘭殿沸歡聲岐

凝親王羨聰明左右驚英姿涵玉裕冊禮建金旌入省
龍樓曉歸休鶴禁晴講筵心會道賓苑禮通情誕日愉
謠滿儲庭瑞彩盈兩宮筵具渥六佾舞儀輕靜念孤蹤
遠曾叨四友榮尚稽陪角綺遙祝壽錢鏗

登滕王閣

故閣崢嶸已劫灰又看新閣上煙煤斷碑無日不濃墨
古砌雖秋猶淺苔江閣鳥疑飛不過風輕帆敢趁先開
天高眼迴詩囊小收拾不多空一來

以上緣督集

嚴子陵

周家刑不上大夫法固不足禮有餘何人不願立朝路
未老誰買甘田廬秦阮學士寘勿論漢嫚大臣眡如奴
逸民不出朝士去前有兩生後二疏世祖聰明失之察
待臣少禮多以法當時祿位列三公危似千金懸一髮
先生識帝貧賤時富貴何妨與共之云胡君房留不住
無乃平日窺其微龍顏之疏顧豈忍烏喙所伏那可如
初來高蹈疑矯世從後逆覩信知幾退身不勇公孫賀

明泣危機終自墮先生明甚勇如之天地萬物莫吾挫
將星羣立客星孤羣恐難調孤易禍帝座旁邊睡熟間
夢魂已在桐江卧將星耿耿亘今明不比客星明更大
釣臺集

疎山

在金谿縣

草徑蜿蜒十里閑雲闕若在畫圖看萬松密翠地無影
一水長清天自寒

撫州府志

句

不可以風霜後葉何傷于月雨餘雲

陳郁話腴曾搏齋遭論歸賦自省詩中一聯云託物寄情得坡之意

王 蘭

蘭字謙仲廬江人乾道五年進士歷官禮部尚書樞密使卒謚獻肅有軒山集

中塔悟空禪院有引

予前年自江西召還以十二月六日抵修門雨後微雪宿接待院今得罪去國復以是日雪中來明日過

臯亭見福公長老言及相與歎息因留三絕紹熙改
元軒山居士王蘭

重到招提恰兩年北窗風雪擁衾眠客來休說邯鄲夢
世事端知不偶然

富貴危機豈獨今且從麋鹿逐山林祇慙莫報君恩重
敢廢惓惓畝畝心

臯亭回首輭紅塵晴日僧房暖似春禪老耽耽如卧虎
相逢一笑問來因

三首見臯亭塔院石刻

蕭之敏

之敏潯陽人官御史

滴翠樓

并序

乾道五年三月十八日遇堪村逆旅主人徐季登飲
予小樓之上且求樓名予曰亂山滴翠衣裘溼此東
坡昌化之詩也請以滴翠名之可乎季登曰唯唯賦
兩絕以志之

一溪流水漾殘春上有高樓碧瓦新
溪路晝陰元不雨

卻愁空翠溼衣巾

咸淳臨安志

楊簡

簡字敬仲慈谿人乾道五年進士寧宗朝累官
將作少監出知温州以寶謨閣學士致仕卒謚
文元學者稱慈湖先生有慈湖甲稿

絕句

淨几橫琴曉寒梅花落在弦間我欲清吟無句轉煩門
外青山

鶴林玉露云句意清圓足覘其所養

題仙山院默齋

漸漸疎鐘動深深一徑開炎光隔林麓清興遶崔嵬擬
作臨流賦應須倩雨催小窗宜挂起且放竹風來

富陽縣志

黃景說

景說字巖老號白石閩人乾道五年進士嘉定
中直祕閣知靜江府有白石丁豪

鶴林玉露姜白石黃巖老學詩于蕭子巖巖
老亦號白石詩亦工時人號雙白石云

梨嶺遇雨

黑風吹雨又黃昏
雞犬數聲何處村
身在嶺雲飛處溼
不關別淚濺成痕

詩人玉屑

陸九齡

九齡字子壽撫州金谿人
乾道五年進士官全州教授
卒寶慶中贈朝奉直祕閣
賜謚文達

與僧淨璋

自從相見白雲間
離別嘗多會聚難
兩度逢迎當汝

水數年隔闊是曹山客來濯足傍僧怪病不烹茶侍者
閑不是故人尋舊隱祇應終日閉禪關

羸奎律髓

陸九韶

九韶字子美九齡弟築室梭山講學其中號梭
山老圃有文集

月石

金谿縣南翠雲山有巖竇正圓如月曰月石

玉兔愛佳泉飲泉化為石規圓立山趾萬古終不息應
厭舊星躔盈稀多缺夕自從寄茲蹤表表無晦蝕光彩

雖暫埋體素得不易神物豈終潛早晚照九域

試茗泉 在翠雲山

邂逅成山行往往有異景奇怪爭呈露獨不見試茗逶
迤即道周泓澄得幽井清之不可濁凝然如自省龜蒙
於越來儻亦煮石鼎豈為渴者甘醉夢當一警

以上撫
州府志

陸九淵

九淵字子靜九韶弟乾道八年進士調靖安簿
累官著作丞光宗即位除知荆門軍務卒謚文

安嘗結精舍于貴溪之象山學者稱象山先生

有集

疎山 在金谿西南

村靜蛙聲幽林芳鳥語警山磬分皓葩隴麥搖青穎離
懷付西江歸心薄東嶺忽忘飢歟憂翻令發深省

子規

柳院竹亭茅店雲蕪風樹烟溪聽徹殘陽月下不論已

蜀東西 以上象山集

馬先覺

先覺字少伊崑山人乾道初進士累遷兵部架

閣號得閑居士有慚筆集

喜樂功成招范至能入詩社

燕國將軍善主盟新封詩將一軍驚范家老子登壇後
鼓出胸中十萬兵

慧聚寺神濟善醫能知人死生既享高壽臨終甚
了了作詩哭之

端的西來了世緣有身寧甯自謀安殷勤療病肱三折
去住無心指一彈貝葉翻餘清磬在梵香飄斷暮鐘殘
祇今雙樹婆娑影空鎖靈山片月寒

崑山雜詠

王時會

時會明州奉化人乾道中進士

徐鳧巖

絕壑攬空雲與平橫飛寒瀑萬年聲杖藜過盡人間險

獨向千山頂上行

雪竇寺志

陳蒙

游雲門

杖策耶溪寺風流憶晉唐
門深雲未散梁古帖猶香
晚翠千峯遠春深一澗長
徘徊松影下覓句向斜陽

雲門志畧

范偃

偃字公武乾道中知晉陵縣

題慧聚寺次孟郊張祐韻

散策欲薄暮疎鐘猶殷牀
風烟函古趣巖壑生幽香
仰

首逼象緯俯視眦川光向來非突兀幾成虎豹場

飛閣臨無地具區平可吞高巖聳怪石老木纏雲根人
散魚蝦市帆歸葭葦村每來豁塵慮不妨頻款門

崑山
雜詠

王寧

寧常州人乾道中進士

和樓守浮遠堂留題

久去鄉關始一來竹輿行樂亦佳哉還尋童子釣游處
又趁史君旌騎迴風物于人隨意好江山如畫得天開

向來紀勝歸名筆喜為重鑱置石崖

咸淳昆陵志


彭正建

正建乾道中以詩名

絕句

天與蓮峯作逸民舊時相識幾人存
家書千里嬾開眼
僦屋兩間長閉門

萬姓統譜



宋詩紀事卷五十三

欽定四庫全書

集部

宋詩紀事卷五十四

詳校官監察御史_臣李陽樞

侍讀_臣孫球覆勘

總校官進士_臣繆琪

校對官中書_臣牛稔文

謄錄監生_臣范廷驊

欽定四庫全書

宋詩紀事卷五十四

錢塘厲鶚撰

胡朝穎

朝穎字達卿淳安人乾道八年進士官提刑有

靜軒集

風鈴

風不能調碎玉聲宮商濫奏竟難名誰家稚女敲方響

一曲從頭學不成

旅夜書懷

十日春光九日陰，故關千里未歸心。
遙憐兒女寒窗底，指點燈花語夜深。

以上前賢小集拾遺

小金山

天光雲影碧相涵，百頃玻璃一望閒。
綠水遶門迷客渡，白雲終日伴僧閑。
疎鐘破曉潛蚪動，老木成陰倦鳥還。
喚取頭陀磨石壁，為渠題作小金山。

淳安縣志

王孝巖

孝巖吳興人乾道八年進士淳熙閒處州推官

舫齋

孝巖建

我本湖濬一漫郎生來住處波茫茫時尋畫舸破烟水
菰蒲滿路荷花香一川窈窕詫紅蓼兩岸蘆葦明秋霜
船頭鷗鳥日來往溪上風月相迎將一行作吏便相失
合眼靈運春池塘紛紛雁鶩實可厭紙尾姓字隨低昂
簿書終是俗人甚江湖到了難相忘公餘賴有數椽在
疎櫺兩行如船裝不知風波世路險穩著萬斛隨風檣

人生短篷何日近向來蒼雪今括蒼江山轉柁千萬里
故人兩地遙相望誰能為我幻竹葉頃刻泛宅歸滄浪
祇憑平生氣湖海隨所寓處為舳艫夜寒滿載明月窗
北風打頭人不忙動來況自不如靜悔吝不到虛舟傍
胸襟五湖與三江是中莫測誰望洋直湏喚取李郭輩
相與共泛無何鄉

處州府志

陳傳良

傳良字君舉溫州瑞安人乾道八年進士寧宗

朝累遷中書舍人除寶謨閣待制卒諡文節有
止齋集

止齋即事

教子時開卷逢人強整襟最貧看晚節多病得初心地
僻芟蓮好山低竹樹深寄聲同燕社明日又秋砧

題仙巖梅雨潭

衮衮羣山俱入海堂堂背水若重闌怒號懸瀑從天下
傑立蒼崖夾道陳晉宋至今堪屈指東南如此豈無人

結廬作對吾何敢聊向漁樵寄此身

癸丑冬車駕過宮畱相還朝

一聲警蹕接天齊馳道無塵馬不嘶月御順行隨日轂
乾端和氣市坤倪三槐相繼歸公袞細柳還須聽將輦
老矣尚能歌二聖不應專美在浯溪

以上止齋集

劉 燾

燾字晦伯建陽人受學晦翁東萊之門乾道八
年第進士寧宗朝累遷國子司業奏乞罷偽學

之禁擢權工部尚書兼太子右庶子卒贈光祿
大夫諡文簡有雲莊外集

金國賀正旦使人到闕錫宴紫宸殿

榆關玉塞靜無塵嘉定于今第四春兩國交馳通好使
八方同作太平人翠鼉鼓奏娛嘉客白獸樽浮賞諫臣
聖壽從茲天共遠年年玉帛會楓宸

瑞慶聖節集英殿宴

皇家卜世過周唐天啟真人應運翔抱日預占恭邸夢

飛龍曾報皖山祥翠雲影外來金母紅霧香中擁玉皇
樂府賦工無以祝願將金鑑代珠囊

東宮

鶴駕通宵入問安龍墀清曉狎朝班天顏喜見重輪月
春色先回萬歲山

皇帝閣春帖子

東風昨夜入簾帷便覺深宮漏影遲一曲涼州花盡放
不須更作報春詩

以上雲莊外集

李大異

大異字伯珍隆興府新建人乾道八年進士仕至諫議大夫知建康府

曾兄惠然見臨篤敘世契示以先哲遺墨稽首敬

觀因題其後

嘉泰壬戌七夕前三日

家傳文獻六經香袖有驪珠日光喬木陰陰人已遠

祇應故笏在甘棠

鐵網珊瑚

姚宋佐

宋佐字輔之郴州人乾道八年進士為靜江府教授

梅月吟

梅花得月太清生月到梅花越樣明梅月蕭疎兩奇絕
有人踏月繞花行

詩人玉屑

丁逢

逢晉陵人乾道進士官至寶謨閣待制知郴州

次袁尚書巫山十二峯二十五韻

半雨半晴山弄姿，溼雲吹風不成癡。
薜蘿蕪蘚漸徧楚宮碧，蒲萄未漲巴江遲。
西南大尹初涉境，山川效職加瑰奇。
翠屏窺窗故娟妙，松巒映柁相參差。
浮雲擊汰睨青壁，靈君一去今安之。
吟情浩蕩隘宇宙，萬景敢云驕莫隨。
當年楚境半天下，孱王醉夢方昏疲。
珊珊玉佩赤帝女，星鬢羽蓋蜺旌旗。
錫符賜策豈無意，侍臣託諷褰幃帷。
尹今文采繼騷雅，夢得詩魂羞竹枝。
吾行一百八盤上，鑽天但覺雲天低。
荒荒野驛虎豹怒，陰陰嶺樹猿猱嬉。

危登險陟倦三伏口呿背浹嗟胡為豈知舟行有奇觀
山靈祕惜畱歸時青簾白舫夙已具芒屨布鞵將從茲
胷中丘壑未塵土頭上歲月從驅馳雖無勝具逐支許
尚有樂趣同周施何當投劾便歸去登船打鼓清江湄
更催尺一喚公覲同看二六浮脩眉常山蛇陣想魚復
建溪龍焙傾墓頤攤錢畫浪看三老杖藜晚岸尋名緇
昔人汶嶺寄書帖更歌蜀道先吁嘻未若尹外岳牧中
丞疑愛春江之赴滄海清明秋月之挂峨嵋盡驅三峽

波濤筆第入思齊訪落詩

全蜀藝文志

到柳

眼界山逾碧腰輿步轉高未疑禦魑魅自笑尹鼯猱

末路成三折衰年感二毛次山雖漫仕安敢遽辭勞

柳州文志

蔡幼學

幼學字行之瑞安人乾道進士寧宗朝累官權

兵部尚書兼太子詹事卒諡文懿有育德堂集

田園

野水萍無主晴風草自香庭陰新似染物色去如忙岸
樹魚依綠畦花蜨鬪黃家園向來夢靜數四年強

東甌詩集

廖德明

德明字子晦南劍人受業朱子之門登乾道進
士歷官吏部左選郎官奉祠有槎溪集

鬱林郡城

荒烟漠漠雙江上往事悠悠野戍孤春到偏臨青草渡

夢中猶記白鷗湖

粵西詩載

石孝友

孝友字次仲南昌人乾道進士以詞名有金谷遺音

釣臺

桐江波上一羊裘釣得聲名隘九州天子曷嘗遺故舊
先生不肖事王侯

釣臺集

張貴謨

貴謨字子智遂昌人乾道中進士光宗朝除吏

部郎中使金轉朝散大夫嘉泰中直敷文閣知

靜江府

題睢陽五老圖

駟馬鮮能容白髮萬釘終不潤黃壚烏韉席帽紅塵裏

幻出睢陽五老圖

鐵網珊瑚

王炎

炎字晦叔婺源人乾道進士始令臨湘慶元中

官著作佐郎出守湖州有雙溪集

題徐參議所藏唐人浴兒圖

右相嘗慚呼畫師技癢仍復拈毛錐逼真誰作此贗本
亦有妙意生妍姿中庭燕坐必主婦綠雲高髻香羅衣
嫣然嬪妾左右侍前浴能言丹鳳雛娉婷及笄女公子
素腕擁項相攜扶兩兩為朋四髻鬢乳盧隨逐為諧嬉
掌中看珠二少艾捧顙卻立鴉鬟奴屏閒擁膝袖玉筍
疑是夢闌顰翠眉側身背面按箏者冰肌綽約不自持
牀前跪起各姝麗為兒理髮拭淚洩有犬爛斑受摩撫

與人習熟無猜疑梳妝淡薄服製古如見永徽貞觀時
若非侯家及主第人物無此美且都荆釵布襦小家子
生子不如山下麋

題姜堯章舊遊詩卷

出郭栽花涉小園歸調琴譜輯詩編少年豪健今孱斂
休羨騎鯨李謫仙

以上雙溪集

林淳

淳三山人乾道八年以嘉議郎為涇縣令修復

古塘民多稱之

琴溪

湛湛長溪水飛橋遠近通客喧墟市合仙去釣臺空欲

辨磨崖字忽聞遵渚鴻僧無贊公趣誰與論崖中

寧國府志

滕珂

珂南郡人宣城縣丞

謁梅都官墓

百年詩老卧空山猶憶當時語帶酸贏得兒童喚夫子

可憐名位祇都官手編新史唐文備骨立殘碑漢籀漫
落日牛羊上丘隴草埋翁仲獨我冠 宛陵集附

李石

石字知幾資陽人乾道中以薦任太學博士出
為成都倅有方舟集

文獻通考李石紹興末為學官乾道中為郎歷
麾節以論罷趙丞相雄其鄉人也素不善石石
是以晚益困其自序云宋魁魯倉今猶古也

瞿唐峽

我行江南上峽來繫舟夜泊雲雨臺行到西川一萬里
杜鵑聲急桃花開

到夔門呈王待制

手挈東風上水關鳳書迎日看新班五湖家世烏衣巷
三峽樓臺赤甲山畫戟門開春晝永臥龍帳穩海波閑
安危大計須公等天定應知即賜環

以上全蜀藝文志

禮殿

漢人祀周公為先師故鍾會記云周公禮殿
范蜀公鎮云屋制甚古非近世所為秦漢以

來有也內翰王素云其屋制絕異今制後之葺
者惜其古不敢改作

蜀侯作類錦水湄先聖先師同此室巍然夫子據此座
殿以周公名自昔聖人兩兩如一家均是周人先後出
東家想見中夜夢猶與古孫同袞舄斯文授受乃關天
不為漢唐加損益我時來視俎豆事重是漢人斤斧迹
漢宮制度九天上散落人間此其一多因豐屋起戎心
獨此數椽綿歲歷規摹嵒嵒東魯似氣象縹緲西岷敵
竹松猶是斯干詩風雨方知隆棟吉雖然漢獻來至今
閱時已多駒過隙中間豈無鳥鼠慮妙斲不知難輒易

工師不揆亂如麻敢向殿門言匠石詩書譬彼尚闕文
後學如何補遺逸祖龍非意竊登牀科斗有心求壞壁
舊章僅在命如絲誰勒吾詩勝丹浹

成都文類

句

畱船買魚作寒節

元遺山詩注

錢 筭

筭字仲韶端禮姪乾道閒直祕閣出守處州

少微閣

在處州治後郡守關景暉建米芾書額

少微閣應少微星點點雲閒分外明過雨曉來添練水
好山晴後見蓮城昔年人物不常有近世英豪多閒生
顧我把麾慚坐隱落霞孤鶩看題名

括蒼彙紀

林憲

憲字景思吳興人乾道中特科監南嶽廟參政
賀子忱愛其才以孫女妻之因寓居天台賀亡
挈其孥居城西之蕭寺有雪巢小集

梅磴詩話鄉人雪巢林憲景思紹淳中前輩後
居天台少從侍郎徐敦立度游度得句法于魏

昌世衍實後山陳公嫡派也梁溪尤公延之序其詩言景思喜哦初不鍛鍊而落筆立就渾然天成無一語蹈襲唐人之精于詩者不是過楊公廷秀亦云景思之詩似唐人尤楊二公少所許可其論景思詩如出一口非溢美也近世三衢鄭景龍編宋百家詩續選摘出羣花飛盡楊花飛楊花飛盡無可飛天空霜無影等句謂其超出詩人準繩之外亦非虛語

文獻通考陳氏曰景思人高尚詩清澹五言四韻古句尤佳殆逼陶謝

讀陶詩作

吾觀淵明詩了不在言賦有如太和氣周行不停駐時與春為風融和物華布未嘗見用力萬物榮處處時與

秋為月浩然無點注江山滋清絕宇宙靡纖汚乃知淵
明詩本不在詩故邂逅吐所有氣象隨所寓乞食不為
拙華軒不為慕歸來不為高折腰不為沮義皇平步超
無懷真雅素簡談豈能盡學者謾馳步獨有無弦琴明
明一斑露

劉後村詩話

梅花

野梅空山中正為照人開如何綠窗底珠映帶蒼苔頗
似古君子無人自不諧竹徑酒初醒一信清香來

全芳
備祖

寓天台水南

春雨暗前山春雲行遠林月落雞犬靜誰聞梁父吟
巍巍兮高山泠泠兮好音誰聞梁父吟唯恐山不深

台州兜率寺

春江潑天明蕭寺踞山塢荒堦下鳥雀古木颯風雨
徐行石苔花徙倚望江渚日暮山更寒簷頭鈴自語

寺門矚南江江勢浩相嚮風雲互吞吐山色豁林莽
潮頭捲飛烟白雨挾春漲中夜鵝鷺喧誰家海船上

以上赤城

詩集

句

柔櫓晚潮上寒燈深樹中
汲水延晚花推窗數新竹

天空霜無影

誠齋詩話

王從

從字正夫文正公五世孫乾道中添差台州倅
知信州有三近齋餘錄

次韻張彥晉秋日

地迴高樓目天寒故國心江鷗無萬里雲木自千尋門
掩斜陽下人歸落葉深風前悵何許入耳越鄉吟

前賢
小集

拾遺

句

涼風回遠笛暝色帶歸舟塵心依水淨歸鬢與山青
一番風雨催寒食千里鶯花想故園身閑更得憑
陵酒花早殊非愛惜春

以上誠齋詩話

王素

素乾道中漢中郡守

重修山河堰

畫隼精明破曉暎
恰逢寒食過江村
輕烟飛絮漢中道
白葦黃茅渭上屯
人力萬工支水派
天心兩邑漑川原
柳營一飽源頭看
夜雨新肥拍岸痕

陝西通志

滕 齋

齋乾道閒人

桂林西湖再開呈張經畧

維

隱然重望壓邊城號令風行玉帳兵詩思江山真得助
威聲草木盡知名要令萬頃窺黃憲不把千畦付麴生
坐使勝遊還舊觀追隨那得勝公榮

桂勝

梁 竑

題陸賈大夫廟

劉郎辛苦逐秦鹿尚欲長鞭及馬腹蠻夷大長夢不驚
海邊椎髻乘黃屋江淮貔貅始閑暇忍使驅令渡篁竹
陸生手持尺二組喚起老子同分肉詩書尚曉罵儒翁

豈憂傑驚難拘束築壇再拜受王印雄辨泠泠聽不足
當時未有北人輔畱寓年深染汙俗乍聞高論耳目清
如掩笙簧奏冰玉境中勝處應更履更泝餘皇到山麓
大夫何獨粵人重漢廷公卿俱竦服陳平奇計須深念
張子全身甘辟穀此外侯王希識字帶礪功存半誅戮
惟君坐使將相歡燕喜優游劉氏福年少終軍學高步
空有英稱命難續乃知智者應世閒妙似庖丁秦刀熟
往事浮雲變滅盡越水悠悠浸山綠荒祠寂寞傍僧居

日暮飢鴉噪喬木我來三歎重遲留為酌寒泉薦秋菊

夷堅志乾道間梁竑入都儀舟廟下夜夢一客
自稱陸大夫云我抑鬱于此千餘歲矣君幸見
過願留一詩遂題詩于壁而去

單夔

夔錢塘人乾道中以奉議郎知湖州官至侍從

次楊咸亨江郊亭新成二十三韻

瞿塘一門江水傾羣趨激射隨奔鯨舟車冠蓋湊蜀道
孰問張丈連殷兄相逢來往問地主太守詎敢忘將迎

白崖候館久茅絕近即野處披榛荆屏修啟剔作廬舍
夙戒里旅遲留行有如授館及郊勞舉國定制誰先鳴
錢唐鄙人何所似抵掌自視鴻毛輕食焉抑畏墮偷懦
汎觀彼已同虛盈山蹊水滸肆登賞靡嗜傑閣誇崢嶸
朋從簪盍得衆雋塵譚冰釋欣初晴鼎新質我築斯館
棟宇不貴朱連薨入門便足庇風雨揭榜卻借江郊名
時哉蓮幕有嘉客落筆能令風雨驚聯篇累牘溢我目
粲在麗藻舒我情人生晤合良快意胡為四美嗟難并

日光天際發豐蔀此去可並依離明直排閭闔出濫預
肅肅東首歌宵征循崖履坦負無阻為君留取能詩聲
此榜與詩儻不朽此館想同江水清我來歲月媿銷縮
整纓輯履圖歸程遺名冑復計身後謹慮第虞槃水擎
始終感慨遇僚友遂事且喜相湏成勉旃功業早期就
發軔自是天衢亨

四川摠志

鄭鑑

鑑字自明連江人淳熙元年太學釋褐授國子

學正召試除校書郎累遷太子侍講終宣教郎

知台州

香爐山

在連江縣

峙立交輝紫翠閒疎簾半卷鎮長閑神仙似有祈年術

一縷青煙起博山

淳熙三山志

詹駢

駢會稽人淳熙二年進士第一

遊雲門

輕裘肥馬春三月到此經遊花正紅欲覓上方幽隱處
老僧笑指白雲中

雲門志畧

陳孔碩

孔碩字膚仲號北山候官人淳熙初進士紹熙
中邵武宰終祕閣修撰知惠州有北山集

絕句

臘雪逢春次第消等閑著腳上溪橋柳條畢竟如兒女
一夜東風眼便嬌

全芳備祖

寄題劉潛夫子為于齋

聞昔子元子愛歌于為于遺風今有繼此意古為徒犢
價踰刀劒原飴變堇荼聞弦知豈弟聯袂此懽呼近事
先苞篚何人問牧芻聚星亭澗好容我受廬無

後村詩話余曩宰建安扁便齋曰于為于北山
陳公寄詩云云

林夢英

夢英字伯虎閩清人徙撫州游陸象山之間登
淳熙二年進士歷祕書丞學者稱山房先生

金石臺

雲作巖扉風自關清陰半壑樹中閒傍廂更著茅亭好

放入西南一面山

江西通志

碧澗書堂

臨川遇鄒君示我銅陵辨相邀游其閒百聞湏一踐自
從雙耳聾已辦兩足繭武夷乃招隱仙都輒策蹇遙睇
麻源村夢思勞輾轉今披碧澗記華岡訂訛舛疑信吁
莫論是非爭之褊但欣泉石奇堂成書可輦晁侯雲夢

胸妙處參墳典家有萬竹坡琳琅閤營翦徘徊康樂舊
此興尤不淺人生貴自得假物非至善山川侈遭逢所
託各偕顯嚴光釣越灘叔子登楚峴氣象不低摧吾徒
志當勉相思邀未到烟霞自舒卷唯應原上月共照人

孤狷

撫州府志

孫應時

應時字季和自號燭湖居士餘姚人從學朱子
之門淳熙乙未第進士知常熟縣移判邵武軍

未上而卒有集

嚴子陵

簿書流汗走君房
那得狂奴故意降
努力諸公了臺閣

不煩魚雁到桐江

困學紀聞

歸舟晚泊

日落風更起
江頭船不行
淒涼大夫宅
蕭瑟故王城
一日醉重樓
晚千秋萬古
情愁邊寒角
動夜久意難平

益昌僧寺靜境軒

落照久未夕斷雲低不飛孤舟上水急歸鳥度山微蕭
颯天涯鬢淋浪醉後衣憑闌一笑去客夢轉頭非

武擔山

小飲不成醉清談多所欣秋聲搖落日野色盪寒雲心
事長千里腰圍更幾分西風叢桂發倚檻得相聞

武擔西臺

西臺在何許秋草暮雲閒十畝有餘竹一窗無數山望
遠足離思憂時多苦顏相看終惜醉更挈酒餅還

新灘見桃杏書事

今晨明客眼桃杏照江紅
鳥哢蒼山曲人聲翠竹中
獨遊空遠思一笑負春風
便想荊州道簪花醉渚宮

陳仲弓

清濁無心陳仲弓
圓機聊救漢諸公
末流不料兒孫誤
千古黃初佐命功

以上吳禮部詩話

登仙木

在四明山漢劉綱妻樊夫人登此木上昇

劉樊蟬蛻此登仙
老木當年已插天
玉骨半枯猶秀潤

蒼皮新長更榮鮮
蟠桃待熟三千歲
銅狄重摩五百年
化鶴未歸山寂寂
徘徊誰與問因緣

姚江逸詩

呂定

定字仲安新昌人
歷殿前都指麾
龍虎上將軍
有說劍集

登彭城樓

項王臺上白雲秋
亞父墳前草樹稠
山色不隨人事改
水聲長近戍城流
空餘夜月龍神廟
無復春風燕子樓

楚漢興亡俱土壤不須懷古重夷猶

登越王臺

海上荒臺草樹平登臨不盡古人情
白雲萬里懷親舍紅日中天望帝京
百粵山川秋歷落三城樓閣晚崢嶸
醉來徙倚闌干曲聽徹西風畫角聲

以上四朝詩

項安世

安世字平父括蒼人徙家江陵淳熙二年進士
除祕書正字遷校書郎寧宗朝以偽學黨罷開

禧中以直龍圖閣為湖廣轉運判官有平庵悔
豪

永州

日日長沙岸看雲祇念家如何永州夢偏愛在長沙

歛乃曲

靄迺出深樹湘山日落時若非堯女哭即是楚臣啼

次韻羅郢州送別

江上相留不肖留渡江沿岸卻回頭漢江東去人西去

不見高城始是愁

儲州路口小雨

三十年前過此時一雙青髻綰青絲
如今舊雨猶相記
祇傍星星白處吹

春日隄上

高高下下十五里白白紅紅千樹花
總在疎籬斷垣裏
背隄臨水小人家

吹帽臺

千山搖落萬林空
數點黃花酒盞中
半破接羅誰耐管
已將身世付西風

拋毬

綵毬丹柱倚春風
寒食清明罷繡工
漠北將軍貪蹋鞠
豈知兵法在吳宮

糟螯和潘德父

大戴笑汝無穴空
雙螯小戴笑汝有
筐如子臯太元笑
汝長郭索入穴慚
壇升慚猱知心
但有畢吏部臥起與

汝同酒糟後來愛者蘇長公亦祇許汝中山醪固知合
向一立老安得上與三辰翺長公貌喜心未敬雖羨微
生尤惡饗我疑吳儂修稻怨和秫醢汝償民膏雖然因
此得長醉痛貶未必非深褒又疑畢叟妬劉掾曾以螟
蛉輕二豪故回左手就箕踞持蟹藉糟成兩高

以上後
村詩話

釣臺

辣闢山頭破草亭祇湏此地了生平
崎嶇狹世纔伸足又被劉郎賣作名

君房足下竟成談，祇是韓歆已破除。豈有江湖釣竿手，與君臺閣奉文書。

方輿勝覽

雨夜

夜窗疎雨不堪聽，獨坐寒齋萬感生。今夜故人江上宿，如何禁得打篷聲。

後村千家詩

羅點

點字春伯，撫州崇仁人。淳熙二年進士，光宗朝累遷試兵部尚書。寧宗朝拜端明殿學士，簽書

樞密院事卒贈太保諡文恭

鶚按宋史作淳熙三年誤今訂正

巴山喜雨

在崇仁縣南漢豫章守樂巴隱此唐改臨川山

淑元不冠椎兩髻縈青綰綠如堆鴉
藍髮遠望毛髮古
日日惟聞餐暮霞吾家公遠更清絕
帶眼不穿衣不結
好風吹袂任飄飄
夜夜惟聞弄明月
餐霞弄月固不惡
不道農田布龜灼
令君盛服道民苦
偃然袒裼猶不忤
敬持此意款浮丘
浮丘乃與合同憂
急呼風馬駕雲車
二仙方覺裸裎羞
旋加冠巾更束帶
一見浮丘望塵拜
便將

凶歲變豐年談笑之間作霽霈油然雖出南北峯開端
實自浮丘翁浮丘詩家老仙伯故知憂國願年豐邦人
一飽誰所賜父應詔子兄詔弟若還此雨後五日將見

索汝枯魚肆

撫州府志

陳造

造字唐卿高郵人淳熙二年進士調繁昌尉尋
宰定海倅房陵至淮浙安撫使參議晚號江湖
長翁有集

百花樓

樓中香飄百和濃樓上錦纈翻東風玉樽美酒清若空
吳姬妝面相映紅人生一笑不易得是間一醉千金直
元龍百尺君勿論芳時且可金杯側

都梁

淮汴朝宗地孤埤祇眼前譙樓西日淡戍鼓北風傳破
竹非無計澆瓜亦自賢客愁渾幾許撫劒倚吳天

關塞淒涼處青徐指顧邊如何漢正朔不盡禹山川將

畧輕三捷天威重萬全諸公不愒日老子判畱年

題趙秀才壁

日日危亭凭曲欄幾層蒼翠擁烟鬟連朝策馬衝雲去
盡是亭中望處山

泛湖

荷面跳珠小濺衣酒邊團扇已停揮溼雲收盡人間暑

卻度西山載雨歸

以上江湖長翁集

任希夷

希夷字伯起號斯庵伯雨四世孫家邵武淳熙
二年進士寧宗朝累遷禮部尚書兼給事中進
端明殿學士遷簽書樞密院兼參知政事提舉
洞霄宮卒贈少師諡宣獻

鶚按宋史作淳熙三
年誤今訂正

郊壇齋宮

帝籍傍連藹館桑禁林喬木晝陰涼卻從射殿臨江閣
中有通衢夾苑牆

後省紫薇花

金史卷五十四
清曉開軒俯鳳池
小山經雨日增輝
琉璃葉底珊瑚幹
立出池邊是紫薇

檢院即事

禁路風清飛早鴉
官卑難望紫宸衙
了無公事鉤簾坐
一本冬青落細花

左司史侍班

虎旅分行鐵作撾
殿前拜舞一聲譁
輔臣對罷無公事
日照金鋪扇影斜

德壽宮即事

金爵觚棱曉色開
三朝喜氣一時回
聖人先御紅鸞扇
天子龍輿萬騎來

霜曉君王出問安
寶香傳輦護朝寒
五雲深處三宮宴
九奏聲中二聖歡

宴歸還駕七香車
一夕天開六出花
瑞色先凝紫宸殿
春光重到玉皇家

萬年觴舉慶重華
百辟需雲始拜嘉
壽宴開時先雪宴

天花舞罷帶宮花

宗祀慶成

合宮三歲縟儀收太室先期肇自周玉瓚黃流躬裸鬯
大圭元冕薦嘉羞靈臺畢舉三千禮鑾路安行十二旂
導從卻歸齋殿去詰朝壯壁對天休

紫宸朝罷御端門天宇澄清景氣溫丹鳳樓中黃繖立
金雞竿上綵旗翻萬人聳聽風雷號四海均霑雨露恩
須信卑宮勤肆禮君王雅意在元元

宴玉津園江樓

風靜潮痕減江空夕照多
星星波上艇隱隱岸邊莎
風光連北闕景物傍西湖
禁籞濤江上茲樓天下無
虛齋畱御榻小徑近層崖
再拜觀奎畫渾疑侍玉階
參天宮柏翠布地禁花紅
臺沼如文囿規摹有汴風

咸淳臨安志

海棠

紅妝翠袖一番新又向園林作好春
卻笑華清誇睡足

至今羅韞久無塵

後村千家詩

題陳亞之集後

如彼流泉必有源陳家詩律自專門后山得法因鹽鐵

不減唐時杜審言

陳副使集

劉 袞

袞字伯寵崇安人淳熙五年進士除司門郎中

官至朝請郎知西全州自號梅山老人有梅山

詩集

題小漿

去日春蠶吐素絲歸時秋菊剝金衣沙鷗不入鴛鴻侶
依舊滄浪遶釣磯

詩人玉屑伯寵武夷文士嘗宦于朝以臺評而歸有句云云怨而不怒之辭也

葉適

適字正則號水心居士永嘉人淳熙五年進士
寧宗朝歷權吏部侍郎寶文閣待制知建康府
沿江制置使兼制江淮終寶文閣學士卒謚忠

定有水心集

吳子良林下偶談水心詩早已精嚴晚尤高遠
如驛梅吹凍藥柁雨送春聲綠圍齊長柳紅糝
半含桃聽雞催謁駕立馬待紬書野影晨迷樹
天文夜照城矚書天象切浴硯海光翻地深湘
渚浪天遠桂陽城置杜集中何以辨乃若遣臘
冰千筋句春柳一絲燐迷王弼宅蒿長孟郊墳
門邀百客醉囊諱一錢存又特其細者

趙振文在城北廂兩月無日不游馬塍作歌美之
請知振文者同賦

馬塍東西花百里錦雲繡霧參差起長安大車喧廣陌

問以馬塍云未識醑醑縛籬金沙牆薜荔樓閣山茶房
高花何啻千金直著價不到宜深藏青鞵翩翩烏鶴袖
嚴勞引前金蔣後隨園摘藥煎凍酥小分移牀獻春酒
陳通苗傳昔弄兵此地寂寞狐狸行聖人有道賁草木
我輩栽花樂太平知君已于苔水住盡日櫓聲搖上渚
無際滄波蓼自分有情碧落鷗偏聚追逐風光天漫許
拋擲身世人應怒君不見南宮載寶回何如趙子穿花
去

贈杜幼高

杜子五兄弟詞林俱上頭規模古樂府接續後春秋奇
崛令誰賞羈棲浪自愁故園如鏡水日日抱村流

送潘德久

每攜瘦竹身長隱忽引文藤令頗嚴聞道將軍如卻縠
不妨幕府有陶潛江當闊處水新漲春到極頭花倍添
未有羽書吟自好全提白下入詩奩

永嘉橘枝詞

蜜滿房中金作皮人家短日挂疎籬判霜翦露裝船去

不唱楊枝唱橘枝

以上水心集

前日入寺觀牡丹不覺已謝惜其穠豔故以詩悼之

牡丹乘春芳風雨苦相妒朝來小庭中零落已無數魂銷梓澤園腸斷馬嵬路盡日向欄干躊躇不能去

珊瑚網

趙振文

和葉水心馬塍歌

昔年家住長安里春風盡日香塵起紛紛車馬過綺陌
買花人多少人識王侯第宅連苑牆粲若瓊藥敷丹房
花窠近取馬塍本曲欄高檻深密藏主歡對客小舉袖
擊鼓吹簫滿前後真珠一斛聘國姝琥珀千杯酌天酒
幾年農器不鑄兵雨耕雲穫歌且行種花土腴無水旱
園稅十倍田租平拏音來近菰蒲住演漾迴溪通枉渚
霜晴沙淺橘林明日暮水渾魚網聚東門故侯應自許
霸陵醉尉寧須怒何當學稼隨老農荷鋤驅犢田中去

咸淳臨安志

白巽

東屯行

雨足稻畦春水滿插秧未半青短馬塵追逐下關頭
北望東屯轉山坡一川洗盡峽中想遠浦疎林分氣象
溝塍漫漫堰源低灘瀨泠泠石磯響中田築塲亦有廬
翬飛夏屋何渠渠李氏之子今地主少陵祠堂疑故居

名勝志陸務觀高齋記云少陵居夔三徙居皆
名高齋其詩次水門者白帝城之高齋也依葉

餌者漢西之高齋也見一川者東屯之高齋也
東屯李氏居已數世上距少陵纔三易主大歷
初故券猶在白巽東屯行云云



宋詩紀事卷五十四